

## La soa configuracion

Mei que mei<sup>1</sup>, lo casau qu'ei tot au ras<sup>2</sup> de la maison, de la casa. Com ac avem vist en la darrèra ficha, lo son nom actuau qu'ei justament ligat ad aquera particularitat. Entertièner un casau qu'ei un gran tribalh, que còsta hèra<sup>3</sup>, e que vau mei estar suu lòc<sup>4</sup>.

Que cau lo casau que sia plan parat<sup>5</sup>. Lo mièlher qu'ei lo sud e lo sordeish<sup>6</sup> lo nòrd. Que podem pensar que los nostes davancèrs<sup>7</sup>, quan bastivan, que calculavan l'agençament de l'ensemble : los bastiments (maison, bòrda, poralhèra...), la parguia e de segur, lo casau.

En los parçans chic o hèra<sup>8</sup> valonats, la màger part deus casaus tradicionaus que son suberhauçats<sup>9</sup>. Que'n son naturalament quan i a un arriu o ua arrolha<sup>10</sup> o lo varat deu camin o deu camp vesin. Endrets que i a<sup>11</sup>, que curavan<sup>12</sup> lo camin, e la tèrra qui tiravan que permetè de suberhauçar drin mei lo casau. Atau, l'aiga non podè pas groar<sup>13</sup>. En las arribèras<sup>14</sup> qui son tèrras eishugadissas<sup>15</sup>, l'aiga que s'escor e non hè pas hrèita<sup>16</sup> de suberhauçar. Entà poder circular en lo casau e delimitar las culturas, qu'avetz sendèrs o bulèras<sup>17</sup>. Que permeten tanben de har partir l'aiga. Qu'ei sustot en ivèrn e au primtemps qui's pausa aqueth problèma deu tròp d'aiga. Que plau sovent, non hè pas calor e pr'amor de l'umiditat los legumes que pòden sofrir, atrapar malaudias e parièr crebassejar<sup>18</sup> tota la sason.

Un casau que cau que sia barralhat<sup>19</sup> tà virar la poralha e lo pastorís<sup>20</sup>. Segon las tèrras e la preséncia de calhaus, que trobam murrallas o plèishs. Que hèn un microclimat : qu'emparan<sup>21</sup> deu vent e deu hred e la calor deu dia que demora drin mei la nueit. En los plèishs, qu'i vieren los ausèths. Que son ua bona ajuda tau casalèr<sup>22</sup>. En los plèishs e las vielhas murrallas, l'escargotalha<sup>23</sup> que s'i platz. Escargòlhs, limacs e limaquetas que son un poson tau casalèr. En los casaus de uei, lo triscat<sup>24</sup> que remplaça lo mei sovent murrallas e plèishs.

<sup>1</sup> généralement<sup>2</sup> tout à côté<sup>3</sup> cela demande beaucoup de temps<sup>4</sup> sur place<sup>5</sup> bien exposé<sup>6</sup> le pire<sup>7</sup> nos prédécesseurs, nos ancêtres<sup>8</sup> plus ou moins<sup>9</sup> surélevés<sup>10</sup> rigole<sup>11</sup> à certains endroits<sup>12</sup> creusaient<sup>13</sup> stagner<sup>14</sup> plaines alluviales<sup>15</sup> filtrantes, qui se ressuient<sup>16</sup> il n'est pas nécessaire<sup>17</sup> allées<sup>18</sup> être malade, végéter<sup>19</sup> clôturé<sup>20</sup> les animaux de la ferme<sup>21</sup> ils protègent<sup>22</sup> jardinier<sup>23</sup> toutes sortes d'escargots<sup>24</sup> grillage

## DÍSER

### Que cau que tot que visqui

Aquera expression, qu'ei mair nosta qui ac disè sovent quan quauqu'un e's planhè de domaus leugèrs hèits per bèstias sauvatges granas o petitas. Ací dus exemples :

#### EXEMPLE 1

- Las cerisas que començan de madurar mes dobleban los mèrlos e los passerons que las an trobadas !

- Que vòs, que cau que tot que visqui !

#### EXEMPLE 2

- Uèra (espia), quin las avem beròias las leitugas ! Per aquò, que i a quauques limacs e quauques escargòlhs qui las an gostadas !

- Que vòs, que cau que tot que visqui !

La mair qu'ac disè atau, shens jamei argumentar.

En l'exemple 1 qu'averé podut raperar l'utilitat deus ausèths qui minjan insèctes, molluscs...

Tà l'exemple 2 n'ei pas parièr. Estudis qu'amuishan ja, que los gasteropòdes e participan a l'equilibri biologic deu sòu mes quin volets qu'interèssin los qui hèn casau e qui son sovent obligats de har la guèrra aus limacs e aus escargòlhs.

La mair qu'emplegava aqueth díser qui avè entenut en familha e qui s'èra transmetut d'ua generacion a l'auta. Que vien deu temps quan los òmis e las hemnas avèn consciéncia de l'unitat deu monde animau, vegetau, minerau e uman. Que consideravan que cadun avè la soa plaça, lo son ròtle e la soa utilitat. Que sabèn que calè arrespectar aqueth equilibri. Au dia de uei, l'òmi n'arrespècta pas mei lo territòri de las bèstias sauvatjas e n'a pas consciéncia de las consequéncias d'aqueth panatòri<sup>1</sup> entà l'avièner de la nosta tèrra.

<sup>1</sup> vol, malversation